

20 JUN 1999

Mahathir-Umno (Kelantan)

KETEPIKAN PERSELISIHAN UNTUK TAWAN SEMULA KELANTAN, KATA DR MAHATHIR

KUALA LUMPUR, 20 Jun (Bernama) -- Datuk Seri Dr Mahathir Mohamad meminta anggota dan pemimpin Umno di Kelantan bersatu padu dalam usaha Umno menawan semula Kelantan pada pilihan raya umum akan datang.

Perdana Menteri percaya Umno boleh mengalahkan PAS sekiranya anggota dan pemimpin Umno di negeri itu mengutamakan disiplin dan semangat parti.

Beliau menasihati mereka agar mengeneppikan segala perselisihan faham demi perjuangan untuk parti.

Sehubungan itu beliau berkata anggota-anggota dan pemimpin Umno tidak harus lagi mempersoalkan bekas anggota Parti Melayu Semangat 46 (S46) yang menyertai semula Umno.

"Tidak perlu timbul lagi dari mana mereka datang...asalkan mereka ahli Umno yang sah, mereka mempunyai hak yang sama seperti ahli-ahli Umno yang lain," katanya semasa menghadiri makan tengah hari dengan para perwakilan Umno dari Kelantan pada hari keempat dan terakhir Perhimpunan Agung Umno di sini hari ini.

Dr Mahathir ialah Pengerusi Badan Perhubungan Umno Kelantan.

Turut hadir pada majlis itu ialah Timbalan Pengerusi Badan Perhubungan itu Datuk Annuar Musa serta bekas Presiden S46 Tengku Razaleigh Hamzah yang merupakan Ketua Umno Bahagian Gua Musang.

Menurut Dr Mahathir, anggota-anggota Umno tidak perlu takut untuk berdepan dengan PAS.

"Kita harus berhujah dengan mereka dengan asas-asas yang benar," katanya.

Sementara itu Annuar berkata bekas anggota S46 yang menyertai semula Umno kini diterima dan mendapat tempat dalam parti.

Katanya ada antara mereka yang menjadi perwakilan bahagian pada perhimpunan agung parti, malah ada juga yang telah berucap mewakili negeri dalam perbahasan usul.

-- BERNAMA

AZZ RON